

**CUACA PANAS MELAMPAU**

Murid Sekolah Kebangsaan Tengku Bariah, Irfan Iskandar (kiri) dan Putera Muhammad Danish Haiqall Ahmad Faizal, **meletakkan beg sekolah di atas kepala mereka untuk berlindung daripada cuaca panas di Kuala Terengganu, semalam.**

[FOTO ASWADI ALIAS/BH]



BH  
21/3/2016  
m/s 12

# Penutupan sekolah di Kedah, Perlis diputus hari ini

» Dua negeri catat suhu lebih 39 darjah Celsius

Oleh Nor Fazlina Abdul Rahim  
nfazlina@bh.com.my

► Kota Bharu

Kementerian Pendidikan akan membuat keputusan hari ini sama ada sekolah di dua negeri iaitu Kedah dan Perlis akan ditutup berikutan cuaca panas melampau, selepas pemantauan dilakukan selama tiga hari.

Menterinya, Datuk Seri Mahdzir Khalid, berkata dua negeri berkenaan kini mencatatkan suhu lebih 39 darjah Celsius dan keputusan akan dibuat selepas melihat suhu terbaharu hari ini.

“Buat masa sekarang, semua sekolah berjalan seperti biasa dan tiada sebarang aktiviti luar bilik darjah dibenarkan memandangkan cuaca panas.

“Seperti yang saya tegaskan, kita mempunyai Jawatankuasa Peringkat Kebangsaan dan kita perlu merujuk kepada mereka,” katanya pada sidang

media selepas Majlis Profesionalisme Pengetua dan Guru Besar di Jabatan Pendidikan Negeri Kelantan, semalam.

Akhbar semalam melaporkan, Jabatan Meteorologi Malaysia (JMM) meramalkan suhu di beberapa kawasan di Alor Setar, Kedah dan Chuping, Perlis dijangka terus meningkat berikutan fenomena El Nino.

Ketua Pengarahnya, Datuk Che Gayah Ismail, berkata setakat Sabtu lalu, Alor Setar mencatatkan bacaan suhu 39.1 darjah Celsius, manakala Chuping 38.9 darjah Celsius.

## 7,000 permohonan 'guru duka lara'

Sementara itu, Mahdzir berkata, kementerianya menerima 7,000 permohonan daripada 'guru duka lara' yang tinggal berjauhan daripada pasangan sepanjang tahun lalu dengan Kelantan dan Kedah mencatatkan permohonan paling tinggi.

Katanya, daripada jumlah berkenaan, lebih 2,000 permohonan sudah diluluskan dan pihaknya menjangka permohonan terus meningkat antara 2,000 hingga 4,000 menjelang akhir tahun ini.

“Berdasarkan rekod, seramai 20,000 guru di seluruh negara yang berjauhan dengan pasangan mereka. Kementerian

berusaha menangani masalah itu secara berperingkat dan tidak melupakan masalah guru yang berjauhan dengan pasangan masing-masing.

“Kita tidak mahu guru diganggu dengan bebanan berjauhan dengan keluarga yang

mungkin akan menjejaskan kualiti perkhidmatan mereka.

“Kita mahu yang terbaik untuk semua guru supaya mereka juga menghasilkan perkhidmatan terbaik untuk negara,” katanya.



# Jawatankuasa khas bincang pelan tindakan tangani gelombang haba

**Kuala Lumpur:** Jawatankuasa khas akan membincangkan tindakan dan pelan tambahan berhubung isu pengisytiharan Kecemasan Gelombang Haba pada hari ini.

Menteri Sumber Asli dan Alam Sekitar, Datuk Seri Wan Junaidi Tuanku Jaafar, berkata mesyuarat Jawatankuasa Khas Bagi Menangani Gelombang Haba itu akan dipengerusikan Ketua Setiausahanya, Datuk Seri Azizan Ahmad.

“Kita masih belum merangka pelan lanjut jika ia diisytiharkan, namun segala garis panduan yang ada akan diperhalusi supaya mudah untuk kita menghadapi sebarang kemungkinan.

“Pakar daripada semua agensi yang berada di bawah jawatankuasa ini akan berkumpul untuk berbincang sebelum keputusannya diusulkan kepada Kabinet nanti,” katanya ketika dihubungi BH, semalam.

Bagi tahap amaran pertama iaitu suhu melebihi 37 darjah Celsius, Jabatan Meteorologi akan mengeluarkan amaran gelombang haba dan semua aktiviti pelajaran di luar bangunan serta sukan akan ditangguhkan, selain orang ramai, terutama warga tua dan kanak-kanak mengehendak aktiviti luar.

Bagi tahap amaran kedua iaitu suhu melebihi 37 darjah Celsius selama lebih 72 jam dan peningkatkan suhu berterusan, tindakan bagi amaran pertama akan dite-



Cuaca panas melampau tidak menghalang orang ramai bercuti di Zoo Negara. Tinjauan menunjukkan orang ramai **membawa air, payung dan kain basah** bagi menangani cuaca panas.

BH  
21/3/2016  
M/S 13



## **Keadaan jerebu** yang melanda sekitar Tanjung Lipat di Likas, Kota Kinabalu.

[FOTO MALAI ROSMAH TUAH/BH]

ruskan, selain menanggulangi sesi persekolahan serta menyelaraskan mesyuarat khas bagi membincangkan tindakan kecemasan untuk menangani cuaca panas melampau berpanjangan.

Wan Junaidi berkata, pihaknya juga meneruskan pemantauan di beberapa kawasan yang mencapai suhu melampau walaupun berlaku hujan di beberapa lokasi di Wilayah Persekutuan, Sabah dan Sarawak.

“Pemantauan yang dijalankan sudah masuk hari ketiga dan Kementerian Pendidikan berhak memutuskan untuk menangguhkan sesi persekolahan jika suhu melebihi 37 darjah Celsius selama lebih 72 jam dan peningkatan suhu berterusan.

“Bagaimanapun, jika sekolah itu mempunyai persekitaran yang sejuk dan kipas angin atau pendingin hawa mencukupi, besar kemungkinan tidak perlu penangguhan sesi persekolahan,” katanya.

### **Tak jejas aktiviti hujung minggu**

Sementara itu, fenomena El Nino dan ekuinoks yang ‘bergabung’ melanda negara semalam lang-

sung tidak menjejaskan aktiviti hujung minggu orang ramai.

Guru, Muhamad Zahiruddin Abdul Wahab, 29, berkata tugasnya mengajar di kelas tuisyen tetap diteruskan walaupun cuaca panas membahang.

“Kelas yang saya kendalikan berjalan seperti biasa dalam bangunan sekolah. Tiada bantahan daripada ibu bapa kerana musim peperiksaan semakin hampir, namun saya menasihati pelajar banyak minum air dan menjaga kesihatan mereka,” katanya.

Penganalisis makmal, Mazlan Md Nor, 27, berkata beliau mengurangkan aktiviti luar kerana intensiti cahaya matahari amat tinggi terutama pada waktu tengah hari.

“Saya berusaha menyelesaikan segala urusan pada awal pagi atau lewat petang bagi mengelak cuaca panas yang ekstrem ini. Waktu malam pula akan diisi dengan bersukan supaya saya kekal sihat dan cergas,” katanya.

Di **Alor Setar**, pelajar sekolah terpaksa membataskan aktiviti mereka kerana cuaca panas me-

lampau iaitu 34 darjah Celsius pada jam 12 tengah hari semalam sebelum meningkat kepada 36 darjah Celsius pada jam 4 petang.

### **Pelajar merungut keletihan**

Pesara kerajaan, Osman Jaafar, 63, berkata dua anaknya, Nur Syafiqah, 12, dan Nur Afiqah, 8, merungut keletihan dan hilang selera makan.

“Mereka perlu meneruskan persekolahan supaya tidak ketinggalan dalam pelajaran. Pihak sekolah juga disaran mengagihkan air mineral kepada murid kerana bekalan sebotol air dari rumah tidak mencukupi,” katanya.

Suri rumah, Norazian Abdullah, 40, berkata sepanjang musim cuaca panas ini, anaknya, Marsya Auni Irdina Rohizam, 11, dan Marissa Airis, 7, sering mengalami demam dan batuk.

“Saya akan memastikan mereka minum air secukupnya, selain makan vitamin supaya tahap kesihatan mereka dalam keadaan baik,” katanya.